



Samuel natus est Antuerpiæ patre Iacobo, ex gente Quickelbergia, Audonardi quoque celeberrima, anno millesimo quingentesimo uicesimo nono. Is à teneris annis Gandavi operam literis dedit, & ibidem prima artium fundamēta fecit. Cum ad decimum ætatis annum peruenisset, Norinbergam perductus est, atque flagranti desiderio authorum lectioni incumbere, atque liberales artes discere cœpit. Ab adolescentiâ quoque herbarum & Medicorum principijs delectatus fuit. In eo studio tantisper hæsit, dum sibi uiam ad Philologiam & Historiam præpararet. Postea aliquandiū regiones Bavarix inuisit, atque anno ætatis decimo octavo Basileam peruenit. Ibi in Academia lectiones audiuit, atque ob uarias ingenij dotes (quas uel tum in eo animaduertent) mihi familiariter notus fuit. præter lectiones uerò publicas priuatim etiam in philosophicis audiebat D. Huldricum Coccium, & Hieronymum Vuolffium, uiros doctissimos, idque maximo fructu. Ab eo loco sese Friburgum, postea Augustam Vindelicorum contulit, ut Imperij conuentus, qui post bellum Smalkaldicum frequenter ibi celebrabantur, contemplaretur. Eo tempore liberalitatem D. Fuckerorum sensit, atque ad studia sua continuanda in Bawariam rediit, anno Christi millesimo quingentesimo quinquagesimo. Cum Ingolstadtij degeret, aliquoties loco professorum publice legit, atque ingenij sui uires declarauit, ut quorundam petitionibus acquiesceret, ubi etiam ob præclaras animi & corporis dotes multis innotescere cœpit. Paulo post Samuel dominis Fuckeris in Bibliotheca exornanda, & immenso antiquitatum & imaginum promptuario & theatro comparando, operam dedit. Interea tamen sua priuata studia excoluit, atque hoc modo Bawariæ ducibus mirifice inuatus fuit.